

前明譜序

青原白鷺之間山水秀美其磅礴鬱積儲精毓粹降神斯土爲將相卿士大夫碩儒鉅公其豐功盛烈大忠大節照耀今古他郡莫之或先然而守鄉郡宰鄉縣則未之聞也太和陳公諱端者任唐參將勅封將軍鎮潭州落業於楚是故大博先生須侯劉公銘其墓有曰前不可以有一後不可以有二良有以也嘗考世家大族後嗣崢嶸宜也乃一再傳之後或流徙於寓或若敖其宗在所不免陳氏子孫修身勵行種學績文以求無忝仕至三品者有矣仕至州縣丞佐者有矣其家居者乘肥遯之高

其客寓者隆恭敬之習莫不爲世所景慕非他族之比者孰知其故哉將軍由洪州來千有餘年後人聞詩禮之訓循忠厚之規克肖於洪州府君相承弗替者又豈偶然之故哉族舊有譜因亂失其本真陳氏大懼久而湮沒遂葺爲新譜支分彙列有條不紊編成攜而求予文以識本末予壻於陳氏歲時往來甚稔進拜其長上則雍容矩矱之中退卽其俊秀則沉浸詞章之內投壺以相娛琴書以相尙乃今希濶幾十春秋矣於是編閱斯譜厯指其名某也昔所親炙某也昔所肩隨某也昔所未識俯仰陳迹不能不以之興懷予老矣何幸得廁名於其間哉雖

吾欲極言不能喻之於懷者矣蓋譜者名也有其名必務其實
自今陳氏宗族篤其親而厚其倫重其近而念其遠家立五世
之宗俎豆馨香以時冠婚喪祭有禮德義以勸過失以規患難
以扶持功名以顯耀則譜表而有名裏而有實乃親戚之至情
亦陳氏繼述之志也於是乎書

洪武十八年乙丑五月朔勅賜歸田七十翁姻末廬陵劉典拜
手

序

自予尋宗長沙兼訪威烈將軍後以我祖是其自出並從唐
主同光立業開基歷今六百餘載而陳之族屬亦復盛多因信
盡忠報國之祖其爲長養子孫者類皆培植厚而發源長也是
歲余族譜成同宗畢至適陳君良福亦載譜俱來屬余問序余
以汝祖端公與余濛祖並誌閱八世而參將團公亦自威望卓
卓其他祿食千鍾爵登上品指弗勝屈則斯譜之輯是亦昭盛
典於將來垂家聲於不墜更閱異時而仍有尋宗合族之舉覽
譜之所載坵墓備具遠近不遺木本水源誠足動仁人孝子之

感陳氏之興其曷有艾乎

正德十四年冬十一月望日光祿大夫柱國少師太子太保三
邊總制左都御史蘭州彭澤謹識

序

長沙陳子良福官居別駕與予同鄉相識甚深一日重修族譜屬余爲序余以子陳氏來至洪州曾聞甲冑纓弁績紀閱譜知至良福已二十餘世矣其間文經武緯代有傳人紀字紀名繼華崇質近至高曾而溯始遷之祖俱寄是譜獲覩手澤長存異日仁人孝子興水源木本之思而終不憾於考據無自者皆得仰藉於是譜之詳且盡者也以明昭穆以篤宗親莫善於此余故樂記數言而無庸以夸大之辭贅

正德十四年冬十一月望日光祿大夫柱國少師兼太子太師吏部尙書李東陽識

前清譜序

吾聞國有紀邑有志家有譜其義一也譜者何所以考源流明倫次別疎戚著其所自出而表揚宗祖訓勉子孫之意亦具乎其中故凡世家巨族皆有譜非有賢智之士莫能舉而修之也星沙陳氏自厥祖端由吾鄉之江州徙於斯迄今三十七輩人文蔚起簪纓累累爲王國楨幹膠庠佳士指不勝屈卽力田服賈輩亦言行不苟孝弟循謹其山川之秀風俗之美祖宗積德之貽如此陳氏舊有譜修於勝國厯今將百年宗支日繁遷徙靡定不因而重修之勢必久而失次遠而難稽疏戚混而并昧

其所自出焉今覽斯譜淵源有自倫次秩如而凡名號官爵及生卒葬祭無不畢具苟非仁人孝子之用心其能爲此敬宗收族之舉哉予於陳族鄉誼也因肯其請書數言以弁其端

清雍正十二年甲寅歲仲秋月

賜進士第出身文林郎知湖南直隸靖州會同縣事加三級紀錄三次年家眷弟袁守定拜撰

序

家之有譜猶國之有史也史以徵實於國尙矣譜以奠世系別尊卑紀功德定名分其於家也顧可忽乎哉吾族籍本江州世稱義門陳氏唐僖宗朝威烈將軍朝禕公諱端因官潭州遂立業於長沙霧陽鄉爲始遷祖迄今厯世逾四十厯年將千紀矣孫支繁衍派別支分或因宦流寓或因貿遠遷散處於各府州縣者指不勝出而溯厥由來則皆同一本夫以一本散爲萬殊欲其源流不失非譜無以誌之而合萬殊仍歸一本欲其倫次不淆非譜無以辨之禮曰尊祖敬宗敬宗故收族譜之作也

不卽敬宗收族之盛舉而爲仁人孝子之所不容已者乎先世祖設公以朝散大夫辭歸糾修族譜厯傳至孟瑞公復修凡先人之德行功勳生卒廬墓子女聘配無不詳且悉自是而後時代日遙世系日廣家自爲乘房各建祠或盡失先政之流傳而自師其意或偶得老譜之殘缺而僅敘一支往跡所存聞其名究不得其實的脈所在異其籍遂不知其宗杳若山河渙如鳬鴈幾何不令祖若宗怨恫於冥冥中耶嗣孫輩用是皇然滋懼矣戊午歲謀諸族衆續修滄浪橋新祖跡也以先塋多在橋左右又置蕃椒塢業擬建公祠妥先靈也事旣成各支子孫均慨

然以聯譜爲念遂謹遵老譜從端公派下叙至太字派共二十世逐房查核次第註明信者詳之疑者仍闕之不敢稍存意見且於太字派下冠以公派務使遠邇親疎咸歸畫一尊卑上下按派可稽昔歐陽公綜天下同姓爲一家雖各祠必共譜我族今日之事亦猶行古之道也昭穆序於上愛敬敦於下原原本本共篤宗盟行見義門孝友之風同居之盛不難再見於今矣豈徒曰家之有乘與國史並重哉

咸豐九年己未歲仲夏月中澣之吉日嗣孫公撰

序

陳氏與吾彭世爲婚姻在唐吾郡侯祖旭湖府君與陳氏威烈將軍諱端者以甥舅好偕遷於湘咸豐丙辰愚纂修族譜以吾譜覆之陳氏譜則符焉夫自唐迄今幾九百年中更累朝兵燹之變而吾家與陳氏猶得世其井閭綿其宗祀簪纓禮樂守而弗渝於以見兩姓祖先之遺澤孔長而其敦嫻睦而厚風俗者有由來矣天下多故一夫倡亂於嶺管所在屠城邑破鄉井者指不勝屈惟吾鄉幸而獨完愚於烽火燎原之時特倡修族譜旣而湘鄉劉子霞仙湘陰郭子筠仙吾鄉周子紹菴皆以次從

事於此愚於三子遜其鴻博劉周譜未之見郭譜例言視余譜益典核卓然傳書誠以亂靡有定而邱隴之重子姓之聯皆有不容已者茲陳氏又溯自始遷祖立總祠爲通譜其二十世太字派上皆合而登之閤深浩博非余譜所幾其精核當視劉譜周譜郭譜何如也抑愚幼讀史高義門之行最後得讀其家訓益嘆羨之近歲竊取其意於家立義塾於祠立族團亦欲稍師遺灋以教育子弟且以爲盜賊憑凌之扞而綿力千百不一逮諸君皆祖義門者也倘有踵其法而行之者不益爲譜帙之光而大爲吾鄉里之保障乎愚故因其請而樂爲之叙

咸豐九年仲夏穀旦同里後學彭申甫麗崧氏拜手謹撰

序

距余居十餘里有滄浪橋義門陳氏祖遺古蹟余屢過其地心識之嗣從城南堯農師遊詢其顛末爲語源流甚悉始祖唐威烈將軍端七世祖宋開州省刺大夫兢俱以孝友受旌當代史策榮之八世祖團兢公四子也承先人析產子姓蕃衍湖南各府州縣胥有支裔科名蔚起代有聞人蓋七百餘年於茲矣而九配夫人祖墓俱在長沙族遠者知其名未至其處實歉然焉歲丁巳陳氏遂集族捐資於橋左不二里許置田宅如干爲公

祠祀地並敘其事於各房譜首信者從之誤者正之疑者闕之
其姓同而根據未確者損之懿矣哉樹木者培其本飲水者思
其源氏族之盛譜系之隆未有如斯者也且夫人必有克敦孝
友之實而後可作法於子孫抑必有不忘孝友之心而後無忝
於祖宗今是譜也族各有房房各有長歲時奉祖訓以裕孫謀
斯爲祖宗之肖子卽盛世之良民在一家則族誼敦在一邑則
人心古孟子曰人人親其親長其長而天下平詎不信哉茲當
粵氛未靖之秋而獨以敬宗收族爲急務聞其風者孝友之心
可油然而生矣 世年眷弟皮炳謹撰

序

予少時讀史至唐僖宗時詔旌江州陳氏義門免其徭役云陳崇數世未嘗分異長幼凡七百餘口不畜婢妾人無間言每食羣坐廣堂幼者別爲一席有犬百餘共一牢食一犬不至羣犬皆不食未嘗不歎仁風和氣其所感應至於如此後又讀至宋淳化元年詔貸江州義門陳兢粟二千石云至陳兢之世子孫益衆嘗苦乏食則心又疑之夫由唐僖宗至宋太宗時中間雖僅百餘年而迭經五代亂離之禍風聲鶴唳無日以甯義門何獨安堵如故子孫益繁後閱他紀載黃巢嘗經其地禁其士卒

不許驚擾義門則又歎和氣所被不獨下格家人上邀天眷並
可以默回浩劫潛格梟雄則甚矣陳氏義門不獨可爲千古處
家庭之良則而亦千古處亂世保身家之奇型也陳氏固天下
巨姓而吾邑尤繁其支派雖不一類多簪纓顯赫科甲蟬聯詢
其發源之祖則皆曰團公團公者卽陳崇之弟端公八世孫也
有子十一皆著籍潭州今則瓜綿椒衍已遍數郡矣前數年團
公後裔曾倡修滄浪橋滄浪橋者端公之孫英仲所建者也閱
千餘年其子孫乃復修之嗣是又合數郡族人建義門總祠終
以後裔之繁支派之衆末由畫一乃謀立通譜自端公以下至

太字派凡二十世止而令十一房族人各領通譜以爲徵其支譜則聽各房自修之烏虜何其世代愈遠族誼愈敦而仁之至義之盡有非他人意想所能及者洵無愧義門後裔矣今夫物必有所本無論人卽下而草木飛走之類亦各有淵源以至於今然其類則宜分混蒿艾於芝蘭參鸞鷟於鸞鶴則人有不曠爲不類者乎是故非與吾同祖者則卽衣冠文物焜耀一時皆可以非種鋤之而不必與之聯如其同宗則卽世之相隔以數十代計地之相去以千萬里計要皆爲吾祖之血脈而不必疑議於其間且夫萬壑分流莫不朝宗者其源合也千枝競秀互

相依比者其根同也然則陳氏通譜之修又烏容已哉今天下
烽煙迭警喘息難安而陳氏乃獨糾合族人聿遵先德吾知義
門盛事必重見於今其和氣之所感當不止如黃巢之不入其
門者而吾讀其譜較之曩昔讀史時益不覺欣然動念肅然歛
容焉

咸豐九年己未夏六月吉日長沙周光墀邵庵氏頓首拜敘

序

且合久必分分久必合此天地循環之理古今不易者也今日聯祖宗之脈絡不卽以合百世之本源乎吾族自始祖端公與兄崇公同居江州數代未分旌表義門封崇公爲江州長史端公事唐以功封威烈將軍勅鎮潭州管轄三邊旣而年老解組立業星沙霧陽鄉之滄浪溪越三世祖英仲公遂修滄浪橋此吾族發源之處子孫羣聚於此者也至八世祖團公家聲益大子孫蕃衍共食三千七百餘口御賜產業二百九十一莊奉勅監護分析散延各省府廳州縣雖支分派別何莫非義門陳氏

之裔云此當日之合而分者也於戲余嘗念切之安得有人焉
窮源溯流綜支派之紛紜仍歸畫一哉幸乙卯歲長邑玉田蔚
林仕範佑芝彥吾雅田南賓等倡族重修滄浪橋致興敬宗收
族之舉聯義門後裔合爲一祠俾數十代之祖靈同享禋祀合
數十派之孫子不忘本根雖未法同居之世德亦可以繼義門
之高風焉由是族等董其事余與理莽翰堂半邨連城月樓等
共襄厥成糾族商議僉曰善欣然樂從量力捐輸就祖墓接壤
之區公置產於蕃椒墩建總祠於斯合族會食亦於斯今橋已
修祖迹復新祠已建祖靈如在族人皆曰合祠不合譜合猶分

也戊午春清明族人咸集余又與族商亦欣然樂從遂修通譜
按籍求真清源核實詳敘世系稽考墓址原原本本有條不紊
俾吾族得以識其尊卑序其昭穆領其墓址無墜尊祖敬宗收
族之意祖靈於此祠式憑焉子孫於斯譜是賴焉此今日之分
而復合者也吾支發源媯汭卜吉羅湘芹藻傳香功德輝於梨
棗簪纓煥彩統緒燦乎琳瑯庶泯老泉塗人之嘆可釋楊子岐
路之悲敢擬鋪張聊伸固鄙因撰數語付之剞劂竊願與南陔
白華同徵不朽云爾

咸豐九年己未仲夏月湘邑三十四派孫輝南慎吾氏謹撰

序

蓋聞尊祖敬宗禮莫重於收族建祠修譜事卽在夫明倫吾族
自端祖始遷潭州肇立基業越八世團公燕翼貽謀螽斯衍慶
溯十一郎之誕育順聚門庭貽千百世之令名光增家乘嗣後
子孫思令緒之非遙念先型之未墜曾於星垣北門創修祠宇
建立宗祊維時祀事孔明拜跪盡簪纓之輩禮儀旣備獻酬傳
祝告之文洎乎乾隆年初咸懷敬祖之心各抱尊親之志如吉
祥巷淳都天井山檀山及湘邑西衝等處各立私祠改易公派
由是星居散處派別支分雖義式同居本源可溯而家非一廟

次序難分嗣孫輩因是穆穆皇皇踴踴濟濟履分莊之故址曷
禁歔歔思一脈之流傳奚容淆亂爰修通譜以示同宗據二十
世以次傳坵墟必紀綜十一支而共叙昭穆攸分俎豆列而上
下有倫涇渭分而清濁不混將見昔也支分城郭莫知桑梓之
區今也族合鄉邦可詠椒聊之實矣

咸豐九年己未歲仲夏月穀旦嗣孫南濱氏謹譔

序

蓋聞安先靈則必有祠紀世系則必有譜子孫之事也雖然難言之矣我族自始祖朝禕公於唐懿宗時受威烈將軍八傳至團公以功封公生十一子陳氏之興於斯爲盛宋初我孟瑞公纂修族譜世傳勿替延及前明避沔陽僞氏嫌子姓離居舊譜散佚其猶有存者僅能得一綫之傳考其祠則祠廢稽其譜則譜亡已閱其祖墓播遷則顛倒失次然尋宗合族舊譜序又嘗言之反覆推維遂慨然於諸事之未竟乙卯年玉田雅田以滄浪橋來與予商蔚林士範繼起議合族事滄見其議就出邀佑

芝南濱慎吾等合力監修由是諸務落成商賈蕃椒墾田業次
之修橋繼以續譜嗚乎是誠我等之責也乎嗣後吾等子孫謹
當慎守前謨虔心祭掃清明冬至凜凜勿忘不敢以不知者強
附於知亦不敢以所知者故擯於不知上治祖禰下治子孫旁
治昆弟水源木本於是乎明從此入廟會食轉念丁口支派編
輯周張無私心無偏見無漏筆視前譜綦詳回念我族自唐以
來閱之以時代離之以遷徙蕩之以兵燹散之以遺亡而土食
舊德農服先疇一千餘歲之根本源流猶有可指數而眉列者
不賴有此譜哉祖宗之靈也子孫之事也於來哲不無厚期焉

咸豐九年季夏三十八世孫本淦彥蕃氏謹撰

序

通譜之作也何爲哉羣峯起伏必索脈於崑崙萬派潏洄必探源於星宿以子孫而衍祖宗之緒雖枝繁葉茂罔非一脈相承則反所自生亦正於山之起自崑崙水之原夫星宿而爲仁人孝子所宜數典難忘者吾族自端祖相唐以功封將軍官鎮潭州遂立業於長沙霧陽鄉爲我始遷祖迄今已四十餘世矣瓜綿椒衍傳世無窮或恪守故居或量遷異地星羅碁布派別支分歷代以來其間之迪光先烈昭示來茲者罔不家有乘房有

祠以大著其報本追遠之心而各盡其敬宗收族之念然而時地既殊傳聞互異凡先人邱隴之重手澤之遺詳於此或闕於彼存其名或遺其實互相沿襲其不至木本水源之地視爲荒煙蔓草之區者幾希矣所幸者惟桑與梓尙有老成斷碣殘碑間留遺蹟如吾族之滄浪橋者三世祖 英仲公之所創也事垂千年石漸傾圯廣與族兄玉田等每一經過輒歔歔者久之戊午歲謀諸族眾重爲修葺又以祖墓多在是橋左右遂更集金置蕃家墩業以爲祭掃資至今清明族之人子姓咸在謂祖宗之精靈非祠無以妥之子孫之渙散非譜無以聯之由是佑

芝玉田蔚林慎吾士範等董其成廣興彥吾南濱等襄其事謹
從端公派下總敘二十世後仍冠以公派以俟各支分叙者因
端竟委恍知一本之淵源按籍求真不紊世及之次序則是舉
也上以通微合漠下以敦睦明倫其於古人宗會之制庶乎近
矣朱子云譜以管攝人心而繫宗祀自時厥後我族之子若孫
其各惇行親遜共篤宗盟油然而生孝弟之心羣焉泯虞詐之習
則克紹高曾之矩矱者自丕振孫子之弓裘而義門盛事不難
再見於今日矣吾於族眾有厚望焉

咸豐九年己未孟秋月三十六派孫廣漢謹撰

序

譜牒之修功同邑乘所以奠世系紀功德溯一本之淵源以垂於不朽也吾族自始祖朝禕公節度武安立業大塘滄浪溪等處迄今已歷千紀矣傳世愈久子姓愈繁或分房或分派或徙居異地或各立支祠而欲使疎者猶親遠者猶近舉先人邱隴之重手澤之遺皆一一確指其處永世不謬也蓋綦難矣紀等幸食舊德尙守故居每逢祭掃之期若者當復始若者當更新無不觸於目而警於心焉祇以識淺力綿殊難勝任徒撫此殘碑斷碣不禁爲之太息者久之歲乙卯適族正等以續修滄

浪橋來與余商於是更出而邀族而各支子嗣無不踴躍爭起
謂此地旣我祖發源之所集金以新祖迹尤宜建祠以妥祖靈
合譜以敦族誼此蕃家墩之業所由置也自時厥後我族之子
若孫其各慎守前謨毋忘舊典上以萃渙合漠下以敦睦明倫
則雖不克義式同居而我 祖燕貽之澤亦庶幾綿延於弗墜
爾

咸豐己未季夏月三十六派孫漢紀蔚林氏謹譔

序

人心之良皆知尊祖睦族所賴以有稽者譜也吾族自 始祖
朝禕公由唐懿宗時授封威烈將軍 勅鎮潭州攜其甥彭滌
常均出守南服落業大塘已千餘年矣德行功勳生卒廬墓確
有可憑稽及目前彭常皆時萃聚且會修祠譜以收族而敬宗
惟我族散處如碁布星羅祖蹟遺亡廬墓散失能不心焉傷之
楮等由是出與族屬知事者謀欲隆修舉眾皆踴躍集金合置
蕃家塏田業解修廊宇復述貽章永垂祭掃庶乎巒頭繪而不
遺族姓聯而不隔祖靈歡聚積久常新也是爲序

咸豐九年己未季夏月三十四世孫洪楮士範氏謹撰